



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ԵԶՐԱԿԱՑՈՒԹՅՈՒՆ 03/2022-2023

ԱՆՆԱ ԳՐԻԳՈՐՅԱՆԻ ԿՈՂՄԻՑ ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԽԱԽՏՄԱՆ ԲԱՑԱԿԱՅՈՒԹՅԱՆ ՎԵՐԱԲԵՐՅԱԼ

ք. Երևան

20 փետրվարի, 2023 թվական

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ն. Համբարձումյանի, Մ. Գալստյանի և Լ. Ալեքսանյանի (այսուհետ՝ Հանձնաժողով), քննության առնելով Ազգային ժողովի պատգամավոր Աննա Գրիգորյանի կողմից անհամատեղելիության պահանջների առերևույթ խախտման վերաբերյալ 2022 թվականի նոյեմբերի 22-ին հարուցված թիվ 03/2022 վարույթի նյութերը,

պարզեց.

I. Նախապայմանություն

Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը և հաշվի առնելով Հանձնաժողովի հանրային ծառայողների վարքագծի վերահսկողության վարչության 2022 թվականի աշխատանքային ծրագրով հաստատված միջոցառումներով նախատեսված՝ Հանձնաժողովի կողմից Ազգային ժողովի պատգամավորների անհամատեղելիության պահանջների պահպանման ստուգման շրջանակում իրականացված Աննա Գրիգորյանի 2021 թվականի տարեկան շահերի

հայտարարագրում ներկայացված համապատասխան տվյալների ստուգման արդյունքները, արձանագրել է հետևյալը.

1. Արդարադատության Նախարարության իրավաբանական անձանց պետական ռեգիստրի էլեկտրոնային միասնական գրանցամատյանից 2023 թվականի հունվարի 13-ին ներբեռնված տեղեկատվության համաձայն՝ Աննա Գրիգորյանը 2017 թվականի նոյեմբերի 15-ից հանդիսանում է «Ջիմել» ՍՊ ընկերության (<ՎՀՀ 09426002) (այսուհետ՝ նաև Ընկերություն) 50%-ի բաժնետեր:

2. Աննա Գրիգորյանն իր կողմից ներկայացված 2021 թվականի տարեկան շահերի հայտարարագրում (այսուհետ՝ Հայտարարագիր) Ընկերությունում մասնակցություն, ինչպես նաև առևտրային կազմակերպությունների կառավարման, վարչական կամ վերահսկողական մարմիններում ներկայացվածության վերաբերյալ տվյալներ չի ներկայացրել:

3. Ընկերության բաժնեմասը հավատարմագրային կառավարման հանձնելու վերաբերյալ Հայտարարագրում տվյալներ ներկայացված չեն:

4. Աննա Գրիգորյանը ստանձնել է Ազգային ժողովի պատգամավորի պաշտոնը **2020 թվականի դեկտեմբերի 29-ին:**

5. 2022 թվականի նոյեմբերի 22-ին Հանձնաժողովը կայացրել է թիվ 03/2022 որոշումը՝ Ազգային ժողովի պատգամավոր Աննա Գրիգորյանի կողմից անհամատեղելիության պահանջների առերևույթ խախտման վերաբերյալ վարույթ հարուցելու մասին:

6. 2022 թվականի նոյեմբերի 25-ին թիվ Ե-01/2935-2022 գրությամբ անհամատեղելիության պահանջների առերևույթ խախտման վերաբերյալ վարույթ հարուցելու մասին որոշումը փոստային ծառայության միջոցով ուղարկվել է Աննա Գրիգորյանին՝ միաժամանակ առաջարկելով ներկայացնել պարզաբանում վարույթի շրջանակում քննարկվող փաստական հանգամանքների վերաբերյալ և դրան կցել փաստարկների հիմնավորվածությունը հավաստող նյութեր: Փոստային առաքման ծրարը՝ «Չպահանջված» մակնշումով 2022 թվականի նոյեմբերի 28-ին հետ է վերադարձվել:

7. 2022 թվականի նոյեմբերի 30-ին վարույթ հարուցելու մասին որոշումը էլեկտրոնային փոստի միջոցով ներկայացվել է Աննա Գրիգորյանին, վերջինս նույն

օրը ներկայացրել է էլեկտրոնային հավաստում՝ որոշումը և ուղեկցող գրույթունը ստանալու վերաբերյալ:

8. «Զիմել» ՍՊ ընկերությունում Աննա Գրիգորյանի բաժնեմասը հավատարմագրային կառավարման հանձնելու հարցի վերաբերյալ տվյալներ ստանալու, ինչպես նաև անհամատեղելիության պահանջների պահպանման, հնարավոր այլ խախտումներ ի հայտ բերելու նպատակով ուսումնասիրվել են Արդարադատության նախարարության իրավաբանական անձանց պետական ռեգիստրի էլեկտրոնային միասնական գրանցամատյանում առկա տվյալները, ինչպես նաև կատարվել են հարցումներ 2022 թվականի դեկտեմբերի 28-ին Արդարադատության նախարարության իրավաբանական անձանց պետական ռեգիստրի գործակալություն, 2022 թվականի դեկտեմբերի 28-ին «Հայաստանի Կենտրոնական Դեպոզիտարիա» ԲԲԸ-ին, 2023 թվականի հունվարի 20-ին Պետական եկամուտների կոմիտեին:

II. Վարույթի մասնակցի ներկայացրած դիրքորոշում ու պարզաբանումներ

2022 թվականի դեկտեմբերի 8-ին Հանձնաժողովում ստացված թիվ Մ-5120-2022 գրությամբ Աննա Գրիգորյանի կողմից ներկայացվել է պարզաբանում՝ Վարույթի շրջանակում քննարկվող փաստական հանգամանքների վերաբերյալ, որով վերջինս հայտնում է, որ 2020 թվականի դեկտեմբեր ամսից ստանձնել է Ազգային Ժողովի պատգամավորի պաշտոնը: Պաշտոնատար անձի պաշտոնական պարտականությունները ստանձնելու հայտարարագրում իր կողմից նշվել է առևտրային կազմակերպության կանոնադրական կապիտալում 50% բաժնեմասնակցության վերաբերյալ: Միաժամանակ, նշել է, որ 2020 թվականի նոյեմբերի 21-ին «Զիմել» ՍՊ ընկերության բաժնեմասը հանձնել է հավատարմագրային կառավարման, որի վերաբերյալ կազմվել է համապատասխան պայմանագիր: Ավելին՝ վերը նշված տեղեկատվությունն արձանագրվել է նաև իր՝ 2020 թվականին ներկայացված Պաշտոնատար անձի գույքի, եկամուտների և շահերի տարեկան հայտարարագրում:

2021 թվականի հունիսի 20-ին ընտրվել է Ազգային Ժողովի պատգամավոր «Հայաստան» կուսակցությունների դաշինքի համապետական ընտրական ցուցակով:

2021 թվականի Պաշտոնատար անձի գույքի, եկամուտների և շահերի տարեկան հայտարարագրի «Բ.3.1. Բաժնային արժեթղթեր և այլ ներդրումներ» ենթաբաժնում հայտարարագրվել է մասնակցություն առևտրային կազմակերպության կանոնադրական կապիտալում: Մինչդեռ, Հայտարարագրի լրացման ընթացքում «Տվյալ տարվա ընթացքում եղել է հավատարմագրային կառավարման հանձնված բաժնեմաս» հարցին պատասխանել է ոչ, քանի որ իր ընկալմամբ տվյալ տարի բառակապակցությունը վերաբերել է 2021 թվականին կնքված արդեն նոր հավատարմագրային կառավարման պայմանագրին: Մինչդեռ, իր կողմից Պայմանագիրը կնքվել է 2020 թվականի նոյեմբերի 21-ին 5 տարի ժամկետով (Պայմանագրի 1-ին մասի 1.6 կետ) և բնականաբար 2021 թվականին շարունակում էր գործել, այդ իսկ պատճառով դրա վերաբերյալ տեղեկությունը չէր ներառվել 2021 թվականի տարեկան հայտարարագրում:

Միաժամանակ հայտնել է, որ 2020 թվականի նոյեմբերի 21-ին կնքված Պայմանագրով գույքի հավատարմագրային կառավարիչ նշանակված՝ Նուրիցա Շահենի Թումանյանը 2022 թվականին մահացել է (թիվ ԲԱ536874 մահվան վկայականը կից ներկայացված է):

Համաձայն ՀՀ քաղաքացիական օրենսգրքի 966-րդ հոդվածի 1-ին մասի 3-րդ կետի՝ գույքի հավատարմագրային կառավարման պայմանագիրը դադարում է հավատարմագրային կառավարիչ-քաղաքացու մահվան, նրան անգործունակ, սահմանափակ գործունակ, անհայտ բացակայող կամ սնանկ ճանաչելու դեպքում:

Հաշվի առնելով վերոգրյալը՝ վերջինիս կողմից 2022 թվականի մարտի 13-ին կնքվել է Բաժնեմասի գույքային կառավարման նոր պայմանագիր, որն ի պատասխան 2022 թվականի սեպտեմբերի 17-ի հաղորդագրության ուղարկվել է Կոռուպցիայի կանխարգելման հանձնաժողովին:

Այսպիսով, համաձայն Աննա Գրիգորյանի դիրքորոշման, ստեղծված իրավիճակը թյուրըմբռնման, սխալի/վրիպակի հետևանք է և իր կողմից թույլ չի տրվել ՀՀ օրենսդրության որևէ խախտում: Պարզաբանմանը կից ներկայացված են մատնանշված բոլոր փաստաթղթերը:

III. ԱԺ պատգամավորի գործունեությանն առնչվող տեղեկություններ

Ազգային ժողովի պաշտոնական կայքից
(<http://www.parliament.am/deputies.php?sel=details&ID=1435&lang=arm>) իրական
ռեժիմում ստացված տեղեկատվության համաձայն՝ Աննա Գրիգորյանը 2020
թվականի դեկտեմբերի 29-ից «Իմ քայլը» կուսակցությունների դաշինքի ընտրական
ցուցակով ընտրվել է Ազգային ժողովի պատգամավոր:

2021թ. հունիսի 20-ին ԱԺ պատգամավոր է ընտրվել «Հայաստան»
կուսակցությունների դաշինքի համապետական ընտրական ցուցակով: 2021
թվականի օգոստոսի 2-ից փաստացի ստանձնել է Ազգային ժողովի պատգամավորի
պաշտոնը:

IV. Վարույթի համար էական նշանակություն ունեցող փաստեր

1. Աննա Գրիգորյանը Ազգային ժողովի պատգամավորի պաշտոնը փաստացի
ստանձնել է **2020 թվականի դեկտեմբերի 29-ին** և շարունակում է պաշտոնավարել
մինչ օրս:

2. Արդարադատության նախարարության իրավաբանական անձանց
պետական ռեգիստրի էլեկտրոնային միասնական գրանցամատյանից 2023
թվականի հունվարի 13-ին ներբեռնված տեղեկատվության համաձայն՝ «Զիմել» ՍՊԸ-
ն հանդիսանում է առևտրային կազմակերպություն, որը հիմնադրվել է 2017 թվականի
նոյեմբերի 15-ին հիմնադիրների ընդհանուր (հիմնադիր) ժողովի որոշմամբ (թիվ 1
արձանագրություն):

3. Արդարադատության նախարարության իրավաբանական անձանց
պետական ռեգիստրի գործակալությունից 2023 թվականի հունվարի 16-ի թիվ
25.8/1824-2023 գրության համաձայն՝ Աննա Գրիգորյանը 2017 թվականի նոյեմբերի
15-ից հանդիսանում է Ընկերության 50%-ի բաժնետեր:

4. 2020 թվականի նոյեմբերի 21-ին Աննա Գրիգորյանի և Նուրիցա Թումանյանի
միջև 5 (հինգ) տարի ժամկետով կնքվել է «Զիմել» ՍՊ ընկերության բաժնեմասի
հավատարմագրային կառավարման պայմանագիր («Զիմել» ՍՊ ընկերության

բաժնեմասի հավատարմագրային կառավարման՝ նոտարական կարգով վավերացված պայմանագրի պատճեն):

5. 2022 թվականի մարտի 11-ին «Ջիմել» ՍՊ ընկերության բաժնեմասի հավատարմագրային կառավարման պայմանագրի հավատարմագրային կառավարիչ Նուրիցա Թումանյանը մահացել է (թիվ ԲԱ536874 մահվան վկայականի պատճեն):

6. 2022 թվականի մարտի 13-ին՝ Աննա Գրիգորյանի և Գայանե Շամիրյանի միջև կնքվել է «Ջիմել» ՍՊ ընկերության բաժնեմասի հավատարմագրային կառավարման պայմանագիր («Ջիմել» ՍՊ ընկերության բաժնեմասի հավատարմագրային կառավարման պայմանագրի պատճեն):

7. Աննա Գրիգորյանի կողմից Հայտարարագրի «Դ.1 Մասնակցությունը առևտրային կազմակերպություններում» և «Դ.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում տվյալներ չեն ներկայացվել Ընկերության կանոնադրական կապիտալում 50 % բաժնեմասնակցության, ինչպես նաև բաժնեմասը հավատարմագրային կառավարման հանձնելու վերաբերյալ:

8. Սույն վարույթի շրջանակներում «Հայաստանի Կենտրոնական Դեպոզիտարիա» ԲԲԸ-ին, Արդարադատության նախարարության իրավաբանական անձանց պետական ռեգիստրի գործակալությանը, ինչպես նաև Պետական եկամուտների կոմիտեին Հանձնաժողովի կողմից կատարված հարցումներին ի պատասխան ներկայացվել է հետևյալ տեղեկատվությունը.

Հանձնաժողովի 2022 թվականի դեկտեմբերի 28-ի թիվ Ե-01/3243-2022 գրությանն ի պատասխան **«Հայաստանի կենտրոնական դեպոզիտարիա» ԲԲԸ-ից 2022 թվականի դեկտեմբերի 30-ի թիվ 3/4321-2022** գրությամբ ստացված տեղեկատվության համաձայն՝ արժեթղթերի հաշվառման և հաշվարկային միասնական համակարգում 2022 թվականի դեկտեմբերի 29-ի դրությամբ Աննա Գրիգորյանի տվյալներով հաշվետեր գրանցված չէ, ինչպես նաև գործարքների վերաբերյալ տեղեկություններ առկա չեն:

Հանձնաժողովի 2022 թվականի դեկտեմբերի 28-ի թիվ Ե-01/3246-2022 գրությանն ի պատասխան **«ԱՆ իրավաբանական անձանց պետական ռեգիստրի**

գործակալությունից 2023 թվականի հունվարի 16-ի թիվ 25.8/1824-2023 գրությամբ ստացված տեղեկատվության համաձայն՝ Աննա Գրիգորյանը հանդիսանում է՝ Ընկերության կանոնադրական կապիտալի 50% բաժնեմասի սեփականատեր, որի լուծարման գործընթացում գտնվելու, կամ գործունեության դադարման մասին տեղեկություններ միասնական գրանցամատյանում առկա չեն: Միաժամանակ, կից տրամադրվել է Ընկերության հիմնադիրների ընդհանուր (հիմնադիր) ժողովի՝ թիվ 1 արձանագրությունը:

Հանձնաժողովի 2023 թվականի հունվարի 19-ի թիվ Ե-01/113-2023 և թիվ Ե-01/124-2023 գրություններին ի պատասխան **ՀՀ Պետական եկամուտների կոմիտեից 2023 թվականի հունվարի 20-ի թիվ 01/71-6/3961-2023 և 2023 թվականի հունվարի 24-ի թիվ 01/71-6/4357-2023** գրություններով ստացված տեղեկատվության համաձայն՝

1) Աննա Գրիգորյանի կողմից 2021 թվականի օգոստոսի 2-ից 2023 թվականի հունվարի 20-ն ընկած ժամանակահատվածում այլ վճարովի աշխատանք կատարելու վերաբերյալ տվյալներ առկա չեն:

2) Ընկերությունը 2023 թվականի հունվարի 24-ի դրությամբ հանդիսանում է գործող առևտրային կազմակերպություն: 2021 և 2022 թվականներն ընկած ժամանակահատվածում իրացման շրջանառության և հարկվող շահույթի վերաբերյալ տվյալներ առկա չեն:

V. Անհամարելիության պահանջին առաջադրվող ներպետական օրենսդրական կարգավորումներ

1. Սահմանադրության 95-րդ հոդվածով սահմանված է, որ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. «Հայաստանի Հանրապետության Ազգային Ժողովի պատգամավորի գործունեության երաշխիքների մասին» օրենքի 2-րդ հոդվածի 1-ին և 2-րդ մասերով ամրագրված է.

«1. Սահմանադրության 95-րդ հոդվածին համապատասխան՝ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

2. Պատգամավորական մանդատն ստանալուց հետո՝ **մեկ ամսվա ընթացքում, պատգամավորը պարտավոր է՝**

- 1) դուրս գալ անհատ ձեռնարկատիրոջ պետական հաշվառումից,
- 2) ազատվել առևտրային կազմակերպություններում զբաղեցրած պաշտոնից,
- 3) **դուրս գալ առևտրային կազմակերպություններից կամ դրանց կանոնադրական կապիտալում իր բաժնեմասն ամբողջությամբ հանձնել հավատարմագրային կառավարման,**
- 4) հրաժարվել առևտրային կազմակերպությունում ուրիշի գույքի հավատարմագրային կառավարումից,
- 5) ազատվել պետական կամ տեղական ինքնակառավարման մարմիններում զբաղեցրած պաշտոններից, բացառությամբ սույն հոդվածի 5-րդ մասում նշված պաշտոնների,
- 6) ազատվել վճարովի հիմունքներով աշխատանքից, բացառությամբ գիտական, կրթական կամ ստեղծագործական աշխատանքի:»:

3. Նույն օրենքի 6-րդ հոդվածով սահմանված է նաև, որ «Հայաստանի Հանրապետության Ազգային Ժողովի պատգամավորի գործունեության երաշխիքների մասին» **օրենքի իմաստով՝ ձեռնարկատիրական գործունեություն**, ինչպես նաև գիտական, կրթական կամ ստեղծագործական

աշխատանք է համարվում «**Հանրային ծառայության մասին**» օրենքով սահմանված համապատասխան գործունեությունը կամ աշխատանքը:

4. «**Հանրային ծառայության մասին**» օրենքի (այսուհետ՝ նաև Օրենք) 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ **քաղաքական**, վարչական, ինքնավար և հայեցողական:

5. Օրենքի 5-րդ հոդվածի 2-րդ մասով սահմանված իրավակարգավորմամբ՝ Ազգային ժողովի պատգամավորի պաշտոնը հանդիսանում է **պետական քաղաքական պաշտոն**:

6. Օրենքի (մինչև «**Հանրային ծառայության մասին**» օրենքում լրացումներ և փոփոխություններ կատարելու մասին») 2022 թվականի դեկտեմբերի 7-ի ՀՕ-540-Ն օրենքի ուժի մեջ մտնելը գործող խմբագրությամբ) 31-րդ հոդվածի 1-ին մասի համաձայն՝ **հանրային պաշտոն զբաղեցնող անձինք** (բացառությամբ համայնքի ավագանու անդամների) և հանրային ծառայողները **չեն կարող զբաղեցնել** իրենց կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, **զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից:

7. Նույն հոդվածի 5-րդ մասի համաձայն՝ հանրային պաշտոն զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա ընթացքում**, պարտավոր են ապահովել սույն հոդվածի 1-ին մասով սահմանված պահանջների կատարումը:

8. Նույն հոդվածի 7-րդ մասի 3-րդ կետի համաձայն՝ սույն օրենքի իմաստով՝ ձեռնարկատիրական գործունեություն է համարվում՝ (...) **առևտրային կազմակերպության մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման:

9. ՀՀ քաղաքացիական օրենսգրքի 954-րդ հոդվածի 1-ին մասի համաձայն՝ գույքի հավատարմագրային կառավարման պայմանագրով մեկ կողմը (կառավարման հիմնադիրը) որոշակի ժամկետով գույք է հանձնում մյուս կողմի (հավատարմագրային կառավարչի) հավատարմագրային կառավարմանը, իսկ մյուս կողմը պարտավորվում է այդ գույքի կառավարումն իրականացնել ի շահ կառավարման հիմնադրի կամ նրա նշած անձի (շահառուի):

10. «Կոռուպցիայի կանխարգելման հանձնաժողովի մասին» օրենքի 27-րդ հոդվածի 1-ին մասի համաձայն՝ ի թիվս այլ դեպքերի, Հանձնաժողովը կարող է անհամատեղելիության պահանջների, այլ սահմանափակումների, վարքագծի կանոնների խախտումների և իրավիճակային շահերի բախման վերաբերյալ վարույթներ հարուցել **Հանձնաժողովի նախաձեռնությամբ՝ հայտարարագրերը վերլուծելիս առերևույթ խախտումներ կամ դեպքեր հայտնաբերելու դեպքում:**

11. «Կոռուպցիայի կանխարգելման հանձնաժողովի մասին» օրենքի 33-րդ հոդվածի 1-ին մասի համաձայն՝ Հանձնաժողովը վարույթի արդյունքում խախտման կամ դեպքի վերաբերյալ ընդունում է եզրակացություն:

Նույն հոդվածի 2-րդ մասի համաձայն՝ վարույթի արդյունքում Հանձնաժողովն ընդունում է եզրակացություն պաշտոն զբաղեցնող անձի կողմից անհամատեղելիության պահանջների կամ այլ սահմանափակումների խախտման առկայության կամ բացակայության մասին կամ համապատասխան պաշտոն զբաղեցնող անձի կողմից վարքագծի կանոնների խախտման առկայության կամ բացակայության մասին, իսկ իրավիճակային շահերի բախման դեպքի կապակցությամբ՝ շահերի բախման իրավիճակի առկայության կամ բացակայության մասին:

VI. Հանձնաժողովի պատճառաբանություններն ու եզրահանգումը

1. Պատգամավորի հանրային պաշտոնը զբաղեցնող անձանց համար ձեռնարկատիրական գործունեությամբ զբաղվելու սահմանափակումն ամրագրված է ինչպես Սահմանադրությամբ, այնպես էլ «Հայաստանի Հանրապետության Ազգային

Ժողովի պատգամավորի գործունեության երաշխիքների մասին» օրենքով և «Հանրային ծառայության մասին» օրենքով:

2. Ձեռնարկատիրական գործունեությամբ զբաղվելու սահմանափակումը, մասնավորապես, չի արգելում հանրային պաշտոն զբաղեցնող անձանց և հանրային ծառայողներին որպես սեփականություն ունենալ բաժնեմաս առևտրային կազմակերպությունում: Ավելին, օրենսդիրը չի զրկում հանրային պաշտոն զբաղեցնող անձանց և հանրային ծառայողներին սեփականության իրավունքով իրենց պատկանող գույքը օգտագործելու և տնօրինելու իրավունքից, այլ տվյալ պաշտոնը զբաղեցնելու հանգամանքով պայմանավորված՝ նախատեսում է օրենքի իմաստով ձեռնարկատիրական գործունեություն համարվող առևտրային կազմակերպությունում ունեցած բաժնեմասնակցության տնօրինման կոնկրետ եղանակ, այն է, պաշտոնում նշանակվելուց (ընտրվելուց) հետո՝ մեկ ամսվա ընթացքում առևտրային կազմակերպության մասնակցի բաժնեմասն (բաժնետոմս, փայ) ամբողջությամբ հանձնել հավատարմագրային կառավարման:

3. Գույքի տնօրինման կոնկրետ եղանակ սահմանելուն զուգահեռ օրենսդիրը հանրային և հանրային ծառայության պաշտոն զբաղեցնող անձանց համար սահմանել է համապատասխան երաշխիքներ, համաձայն որոնց՝ վերջիններս հնարավորություն կունենան պաշտոնի նշանակվելուց կամ ընտրվելուց հետո մեկամսյա ժամկետում վերացնելու իրենց զբաղեցրած պաշտոնի հետ անհամատեղելի այլ գործունեությունը, դրանով իսկ բացառելով կամ նվազագույնի հասցնելով հանրային և հանրային ծառայության պաշտոն զբաղեցնող անձանց մոտ շահերի բախման իրավիճակները: Նման կարգավորումները որևէ կերպ չեն խաթարում անձի՝ Սահմանադրությամբ ամրագրված, սեփականության հիմնարար իրավունքը, քանի որ անձը, հանձնելով առևտրային կազմակերպությունում իր բաժնեմասը հավատարմագրային կառավարման, չի փոխանցում իր սեփականության իրավունքը հավատարմագրային կառավարչին, այլ այդ կերպ իրացնում է իր այդ իրավունքը:

4. Ազգային ժողովի պատգամավորն ունի պետական իշխանության օրենսդիր, ներկայացուցչական մարմնի անդամի սահմանադրաիրավական կարգավիճակ, ինչն անհամատեղելի է գործունեության որոշակի տեսակների հետ: Հանրային պաշտոն

զբաղեցնող անձանց համար օրենսդրությամբ սահմանված որոշակի արգելքների ու սահմանափակումների հիմնական նպատակը **կոռուպցիայի կանխարգելումն է, այդ թվում՝ շահերի հնարավոր բախման իրավիճակների բացառումը:**

Իրավական սահմանափակումների ներքո ենթադրվում է, որ պաշտոնավարման ողջ ժամանակահատվածում հանրային պաշտոն զբաղեցնող անձը պարտավորվում է գործունեություն իրականացնել իր պաշտոնի նկատմամբ սահմանված իրավական որոշակի սահմանափակումների շրջանակներում: Հետևաբար, ընտրվելով հանրային պաշտոնում՝ իրավունքների ու պարտականությունների հետ մեկտեղ պատգամավորը ստանձնում է բազմատեսակ սահմանափակումների ներքո գործելու պարտականություն, որը հետապնդում է խորհրդարանում պատգամավորի կողմից բացառապես օրենսդիր և ներկայացուցչական գործառույթների իրականացումն ապահովելու և ձեռնարկատիրական գործունեությամբ զբաղվող անձանց մուտքը խորհրդարան բացառելու օրինաչափ նպատակը:

5. Վերլուծելով սույն գործով կիրառելի օրենսդրական կարգավորումները, պարզ է դառնում, որ օրենսդիրը սահմանել է հստակ ժամկետ՝ առևտրային կազմակերպության մասնակցի բաժնեմասը հավատարմագրային կառավարման հանձնելու համար, և տվյալ հնարավորությունը սահմանափակել է անձի՝ հանրային կամ հանրային ծառայության պաշտոնում նշանակվելու (ընտրվելու) դեպքով: Այսինքն, օրենսդիրը սահմանել է պայմաններ հանրային կամ հանրային ծառայության պաշտոն զբաղեցնող անձի՝ առևտրային կազմակերպությունում մասնակցությունը ձեռնարկատիրական գործունեություն չհամարվելու համար: Դրանք են՝ երբ անձը մասնակից է եղել առևտրային կազմակերպությանը մինչև պաշտոնի նշանակվելը և, երբ պաշտոնի նշանակելուց հետո առևտրային կազմակերպության մասնակցի բաժնեմասն օրենքով սահմանված ժամկետում ամբողջությամբ հանձնվել է հավատարմագրային կառավարման:

6. Այսպես, 2020 թվականի դեկտեմբերի 29-ից Աննա Գրիգորյանը հանդիսանում է պետական քաղաքական պաշտոն զբաղեցնող անձ, և նրա գործունեության նկատմամբ տարածվում են Սահմանադրության 95-րդ, «Հայաստանի Հանրապետության Ազգային Ժողովի պատգամավորի գործունեության երաշխիքների մասին» օրենքի 2-րդ, Օրենքի 10-րդ և 31-րդ հոդվածների կարգավորումները:

Այսինքն, Աննա Գրիգորյանը պարտավոր էր պաշտոնը ստանձնելուց հետո մեկ ամսվա ընթացքում Ընկերության իր բաժնեմասը օրենքով սահմանված կարգով հանձնել հավատարմագրային կառավարման: Այնուամենայնիվ, Հանձնաժողովը հարկ է համարում վերոնշյալ փաստերը և դրանց վերաբերելի իրավակարգավորումները վերլուծել օրենքի **ձևական և բովանդակային տեսանկյունից:**

7. Տվյալ պարագայում, սույն վարույթի շրջանակներում պարզաբանմամբ ներկայացված փաստական հանգամանքների և կից ներկայացված փաստաթղթերի ուսումնասիրության և համադրման արդյունքում պարզվել է, որ Ընկերության կանոնադրական կապիտալի 50% բաժնեմասը 2020 թվականի նոյեմբերի 20-ից 5 տարի ժամկետով հանձնված է եղել հավատարմագրային կառավարման, ինչի վերաբերյալ տվյալ ներկայացվել է 2020 թվականին ներկայացված Պաշտոնատար անձի գույքի, եկամուտների և շահերի տարեկան հայտարարագրում: 2022 թվականի մարտի 11-ին հավատարմագրային կառավարչի մահվան հանգամանքով պայմանավորված՝ մարտի 13-ին կնքվել է նոր պայմանագիր՝ բաժնեմասը հավատարմագրային կառավարման հանձնելու վերաբերյալ:

Աննա Գրիգորյանն Ազգային ժողովի պատգամավորի պաշտոնը ստանձնել է **2020 թվականի դեկտեմբերի 29-ին**, ինչից հետևում է, որ Ընկերության կանոնադրական կապիտալում 50% բաժնեմասնակցությունն Աննա Գրիգորյանի կողմից պաշտոնը ստանձնելիս արդեն իսկ հանձնված է եղել հավատարմագրային կառավարման: Հանձնաժողովն արձանագրում է, որ ըստ էության, Աննա Գրիգորյանի կողմից դեռևս Ազգային ժողովի պատգամավորի պաշտոնը ստանձնելուց առաջ ձեռնարկվել են անհամատեղելիության պահանջներ սահմանող իրավանորմերի պահպանմանն ուղղված համապատասխան քայլեր՝ Ընկերություն կանոնադրական կապիտալում իր բաժնեմասը հավատարմագրային կառավարման հանձնելու ուղղությամբ:

Վերոնշյալ փաստերի վերլուծության արդյունքում Հանձնաժողովը եզրակացնում է, որ Աննա Գրիգորյանի կողմից ձևական և բովանդակային առումով չեն խախտվել հանրային պաշտոն զբաղեցնող անձին ներկայացվող անհամատեղելիության պահանջները:

Արդյունքում, սույն վարույթի շրջանակներում պարզված փաստական հանգամանքների համադրումից և վերոնշյալ իրավական նորմերի վերլուծությունից Հանձնաժողովը **եզրահանգում է**, որ սույն գործով քննարկված փաստական հանգամանքների շրջանակներում Աննա Գրիգորյանն իր գործողություններով պահպանել է Օրենքի 31-րդ հոդվածի 1-ին մասով հանրային պաշտոն զբաղեցնող անձի համար սահմանված անհամատեղելիության պահանջները:

Հաշվի առնելով վերոգրյալ հիմնավորումները և ղեկավարվելով «Կոռուպցիայի կանխարգելման հանձնաժողովի մասին» օրենքի 22-րդ հոդվածի 1-ին մասի 2-րդ կետով, 24-րդ հոդվածի 1-ին մասի 1-ին կետով, 33-րդ հոդվածի 2-րդ մասով՝ Հանձնաժողովը, գնահատելով գործում առկա ապացույցները, բոլոր հանգամանքների համակողմանի, լրիվ և օբյեկտիվ հետազոտման վրա հիմնված ներքին համոզմամբ՝

ԵԶՐԱԿԱՑՆՈՒՄ Է.

Ազգային ժողովի պատգամավոր Աննա Գրիգորյանի կողմից չեն խախտվել հանրային պաշտոնին օրենսդրությամբ ներկայացվող անհամատեղելիության պահանջները:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒՀԻ ՀԱՐՈՒԹՅՈՒՆՅԱՆ